

Evangelii tenor Lucas 16,19-31



Ei fuva in um reh. Quel sevestgeva cun puorpra e teila fina e fageva mintgadi fiastas e sulazs. Ed in pauper murdiu cun num Lazarus schischeva avon sia porta e fuva plein biergnas. Bugen vess el dustau la fom cun las Brustgas che curdavan giud la meisa dil reh; ils tgauns denton vegnevan e litgavan sias biergnas. In di ei il pauper morts ed ei vegnius purtaus dils aunghels el ravugl d'Abraham. Era il reh ei morts e vegnius satraus.

Sesanflond el reginavel dils morts, turmentaus da grondas peinas, ha el alzau ses egls e viu dalunsch Abraham e Lazarus en siu ravugl. Ed el ha clamau cun aulta vusch: Bab Abraham, hagies cumpassiun da mei e tarmetta Lazarus, per ch'el bogni il péz da siu det ell'aua e frestgenti mia lieunga; pertgei jeu endirel peinas en questas flommas. Mo Abraham ha detg: Miu fegl, seregorda che ti has gudiu il bien duront tia veta, e Lazarus ha giu da pitir.

Ussa denton eis el consolaus e ti turmentaus. E dil reminent ei denter nus e vus in profund precipezi, aschia che quels che lessen ir da cheu vi tier vus pon buca vi, e da leu po negin neu tier nus.

Il reh ha detg: Lu roghel jeu tei, bab, da tarmetter Lazarus ella casa da miu bab. Jeu hai numnadamein tschun frars. Quels duei el avertir, per che buca era els vegnien en quest liug da torturas. Mo Abraham ha rispundiu: Els han Moses ed ils profets, lezs dueien ei tedlar! – Na, bab Abraham, ha il reh detg, mo sch'enzatgi vegn tier els neu dils morts, lu midan ei veta. Mo Abraham ha detg ad el: Sch'els teidlan buca Moses ed ils profets, lu selaian ei buca perschuader, gnanc sch'in dils morts levass si.